



Il davos vischin ch'igl aunghel dalla mort ha clamau igl onn 1971 ord la veta terrestre, ei **Gion Battista Cavegn**. La damaun da Sogn Gion ha il zenn grond annunziau che Niessegner hagi giu commiseraziun cun siu survient Battista e spindrau el da sia dira e dolorusa malsogna. Ils 20 d'october haveva ina greva daguota dil tschurvi taccau il Battista in bi suentermiezdi dado sia casa sil funs e ligiau el vid il letg. Tuts inschigns medicals han buca pli giu pussonza. Sin la fiasta da Nadal haveva Battista saviu vegnir a casa ord il spital, per saver esser a casa culla famiglia quels dis, denton ella davosa ura dils firaus ha la mort suaifiu el.

Naschius ei Gion Battista Cavegn a Rueras, ils 19 da fevrer 1901 sco fegl da Vigeli Cavegn-

Valier. Leu ha el ena passentau si'affonza ensemens cun ses 4 fargliuns e visitau las scolas. Gia sco giuven buob ha ei tuccau al Battista da semetter vid la lavur, seigi da gidar siu bab el puresser, ni ir la stad ad alp. Suenter ver bandunau la scola ei il Battista ius sul Cuolm d'Ursera vi a Hospital sco fumegl. Da mat entuepin nus il Battista puspei a casa, nua che el fa ensemens cun siu bab il pur. Denteren marcadu el era empau cun pors. Lez temps ha ei tuccau ad el da transportar bia punschals sul cuolm vi e neu, deva ei gia aunc negina viafier. La miseria che regeva quels onns ei enconuschenta, miseria da daners e miseria da lavur. Aschia sedecida il Battista da dar si il puresser ch'el haveva acquistau cun gronds sacrificis da ses fargliuns, e da schar siu fatg a tscheins. El sez anfla lavur a Rabius tier Alois Beer da pia memoria. Quei ei stau ils anno 1930.

A Rabius ha Battista era anflau sia futura consorta en la giuvna Helena Maissen, cun la quala el ha fundau la letg igl onn 1934. Lur letg ei stada benedida cun 7 affons, 5 feglis e 2 feglas. La famiglia ei stada per il Battista siu pli grond plascher ed ideal. El ei staus per ses affons e sia consorta in bien ed exemplaric bab da famiglia e mariu ed ha possibilitau a tuts ina bun'existenza da viver. Quei han ses affons era nezegiau ed ein adina stai ad el engrazievels persuenter. Per saver porscher in agen tetg alla famiglia, ha el baghegiau casa igl onn 1936 ora Cavivens. Che quei ei da lez onns buca iu da sez, sa mintgin s'imaginar. Per sia famiglia ha Battista denton mai temiu ni sforz ni sacrificis.

Naven da 1938 ha Battista Cavegn luvrau a Trun tier la firma Mazzetta & Co. El ei staus in

bien luvrer, stimaus ed undraus da patruns e luvrers. Da lez temps curdava la schurnada ora ils meins d'unviern. Per quei temps stueva mintgin sez mirar per paun e fadigia. Il Battista mava quels meins ad uaul, a resgiar lenna e cu ei duvrava era a mazchegiar. Dasperas ha el adina fatg in tec il pur cun tiers mandjels ed ina vacca, per silmeins haver sez il latg. Occupaziun haveva il Battista aschia adina. Star lischents far nuot enconuscheva el buca; enzatgei deva ei adina da trafficar. Tras quei ei Battista era adina vegnius respectaus da mintgin sco um solid, spargnus e luvrus, adina surveitscheivels, da bona luna e bien humor. Ina greva frida ei stau per el igl onn 1966 igl accident, caschunaus tras in auto, arrivond el dalla lavur. Dapi lu ha el mai pli saviu luvrar sin siu post usitau da miradur. Sco um cartent e religius eis el seremess alla veglia da Diu ed era puspei serestabilius oreifer. Disaus sia, entira veta da luvrar, saveva el era ussa buca star e far nuot. Enzatgei trafficava el adina. Ensemens cun siu fegl giuven, ha el ils davos onns rugalaue renovau la casa dadens e dado aschia ch'ella sepresenta oz fetg plascheivlamein. Dasperas haveva el quitaui dalla via da Cavivens e dalla Staziun che quellas eran adina en bien stan.

Ussa havess il Battista saviu viver senza pli bia quitaus ed havess saviu guder ina biala sera dalla veta. Dieus ha denton disponiu auter; sias vias ein misteriusas e mintgaton grevas da capir. Alla consorta ed alla famiglia resta il confiert d'haver possedu in car e bien bab e nunembli deivel mariu e la speronza sin in seveser en l'auter mund. Detti Dieus ad el la bein meritada pagaglia ed il rauus perpeten.